



Broj:
Maglaj,

PRIJEDLOG

Na osnovu člana 8. stav (3), člana 13. stav (2) alineja 4. i člana 36. i 37. Zakona o principima lokalne samouprave u Federaciji BiH („Službene novine Federacije BiH“, br. 49/06 i 51/09), člana 13. stav (1) tačka c) i stav 3. Zakona o pripadnosti javnih prihoda u Federaciji BiH („Službene novine Federacije BiH“, br. 22/06, 43/08, 22/09, 35/14, 94/15 i 17/22), Odluke Ustavnog suda Bosne i Hercegovine („Službeni glasnik BiH“, broj: 12/24) i člana 18. Statuta Općine Maglaj – prečišćen tekst („Službene novine Općine Maglaj“, br. 8/07, 3/08, 6/08, 6/24 i 6/25), Općinsko vijeće Maglaj na ____ redovnoj sjednici, održanoj ____ godine, donosi

ODLUKU o komunalnim taksama općine Maglaj

I OPĆE ODREDBE

Član 1.

Ovom Odlukom propisuju se komunalne takse, utvrđuje njihova visina i određuje način plaćanja na području općine Maglaj.

Član 2.

(Osnovi za plaćanje takse)

Na području općine Maglaj propisuje se i naplaćuje komunalna taksa za:

1. Izvođenje i držanje muzike uživo u ugostiteljskim objektima,
2. Privremeni boravak u hotelima i drugim ugostiteljskim objektima registrovanim za odmor i noćenja,
3. Isticanje objava, oglasa i saopštenja na javnim mjestima,
4. Držanje sredstava za priređivanje zabavnih igara (bilijar, videoigre, fliperi, pikado automati, karte za igru, poker aparati, ruleti, aparati za posebne igre na sreću, sve vrste slot aparata i slično),
5. Zauzimanje prostora i trotoara ispred poslovnih objekata,
6. Korištenje uređaja za pružanje usluga mobilne telefonije i elektroenergetskih objekata kojim se vrši prenos električne energije - trafostanice,

Član 3. (Definicija pojmova)

U smislu ove Odluke:

1. pod izvođenjem i držanjem muzike uživo u ugostiteljskim objektima podrazumjeva se povremeno ili svakodnevno izvođenje muzičkog programa uz pružanje ugostiteljskih usluga,
2. pod privremenim boravkom u hotelima i drugim ugostiteljskim objektima registrovanim za odmor i noćenja podrazumjeva se privremeni boravak do 30 dana u objektima, registrovanim za odmor i noćenja te kod građana koji izdaju sobe –ležaje,
3. pod isticanjem objava, oglasa i saopštenja na javnim mjestima podrazumjeva se isticanje plakata, panoa, postavljanje stalnih panoa, billboard reklamni panoa i display-a na javnim mjestima određenim za te namjene,
4. pod držanjem sredstava za priređivanje zabavnih igara (bilijar, videoigre, fliperi, pikado automati, karte za igru, poker aparati, ruleti, aparati za posebne igre na sreću, sve vrste slot aparata i slično) podrazumjeva se držanje aparata kojima se omogućava priređivanje zabavnih igara i igara na sreću,
5. pod zauzimanjem prostora i trotoara ispred poslovnih objekata podrazumjeva se postavljanje stolova ispred ugostiteljskih objekata, postavljanje stolova, pultova i tezgi za prodaju ili reklamu, zauzimanje slobodnih površina za postavljanje zabavnih radnji koje se vrše od mjesta do mjesta.
6. pod korištenjem sredstava za pružanje usluga mobilne telefonije, podrazumjeva se stavljanje u funkciju baznih stanica mobilne telefonije, mikrobaznih stanica mobilne telefonije, predajnika (pasivnih repetitora), antena i stubova i elektroenergetskih objekata kojim se vrši prenos električne energije – trafostanice.

Član 4. (Nastanak obaveze)

Taksena obaveza iz člana 2. Odluke nastaje u trenutku kada se počinje koristiti predmet ili usluga za čije korištenje je propisano plaćanje komunalne takse.

Član 5. (Obveznici i određivanje visine taksi)

Takseni obveznici su sva pravna i fizička lica registrovana za obavljanje djelatnosti koja posluju na području općine Maglaj, odnosno lica koja koriste predmet, prostor ili pružaju usluge za čije korištenje je propisano plaćanje komunalne takse.

Iznos komunalne takse za uplatu određuje se prema odredbama Tarife komunalnih taksi općine Maglaj koja je sastavni dio ove Odluke.

Član 6.
(Oslobađanje)

Od plaćanja komunalne takse oslobađaju se:

- Državni zakonodavni i izvršni organi vlasti (Bosna i Hercegovina, Federacija Bosne i Hercegovine, Zeničko-dobojski kanton i Općina),
- Sudski i pravosudni organi,
- Javne ustanove iz oblasti odgoja i obrazovanja, prosvjete, nauke, kulture, informisanja, zaštite kulturne i prirodne baštine, zdravstva (osim privatne zdravstvene prakse), socijalne zaštite i vjerske zajednice,
- Komunalna javna društva koja obavljaju proizvodnju i distribuciju vode za piće, odvoz i zbrinjavanje komunalnog smeća za potrebe građana,
- Sportska udruženja i kolektivi,
- Političke partije,
- Udruženja građana - nevladine organizacije,
- Humanitarne i dobrotvorne organizacije,
- Savezi i organizacije ratnih vojnih invalida, porodice šehida i poginulih boraca i demobilisanih boraca, udruženja dobitnika najvećih ratnih priznanja i udruženja logoraša,
- Samostalni privrednici – invalidna lica iz kategorije amputiraca i paraplegičara,
- Depoi apoteka u objektima porodične medicine i u Domu zdravlja Maglaj u okviru J.U. "Narodna apoteka" Maglaj,
- Kreativne, umjetničke i zabavne djelatnosti,
- Takseni obveznici, bilo pravna ili fizička lica, za sve vozne jedinice kojima obavljaju prijevoz za vlastite potrebe,
- Sva fizička i pravna lica koja obavljaju privrednu djelatnost u dijelu Starog grada općine Maglaj. Područje Starog grada općine Maglaj obuhvata sljedeće ulice:
 - Trg Alije Izetbegovića;
 - Donja mahala, sa ulicama: ul. Voljevačka; ul. Čaršijska; ul. Put branilaca; ul. Mustajbega Uzeirbegovića; ul. Jandrošac.
 - Gornja mahala, sa ulicama: ul. Ibrišima Obralića; ul. Zovlje; ul. Čila; ul. 17. novembra 1992.; ul. Tvrđavska; ul. Zgrade; ul. Moruška; ul. Horina mahala; ul. Orsopovačka; ul. Strmi sokak.
- Fizička i pravna lica koja obavljaju djelatnost na području općine Maglaj, registriranu u skladu sa Zakonom o obrtu i srodnim djelatnostima u Federaciji BiH ("Službene novine Federacije BiH", broj: 75/21) i Uredbom o zaštiti tradicionalnih i starih obrta.

II PRIJAVA I NAČIN OBRAČUNA KOMUNALNIH TAKSI

Član 7.

(Razrez taksene obaveze)

Razrez taksene obaveze je unos iznosa taksene obaveze taksenog obveznika u evidenciju Porezne ispostave Maglaj.

Razrez ili ponovni razrez taksene obaveze Porezna ispostava Maglaj izvršava pod sljedećim uvjetima:

- po prijemu taksene prijave ili izmijenjene taksene prijave koju je pripremio takseni obveznik i u kojoj je obračunao taksenu obavezu;
- po usklađivanju iznosa taksene obaveze prijavljene u taksenoj prijavi bilo da je rezultat kontrole poreznog obveznika donesen ili ne ili
- po obračunu takse koji je izvršila Porezna ispostava Maglaj ili po podnošenju taksene prijave koju je Porezna ispostava Maglaj pripremila u ime taksenog obveznika i u kojoj je Porezna ispostava Maglaj obračunala taksenu obavezu.

Član 8.

(Podnošenje taksene obaveze)

Prijavu za razrez komunalne takse iz člana 2. stav (1) tačka 4. i 6. porezni obveznik je dužan podnijeti Poreznoj ispostavi Maglaj do 31. januara tekuće godine, prema stanju na dan 01. januar tekuće godine, za koju se razrez vrši, odnosno u roku od 15 dana od datuma izdavanja rješenja o registraciji, ako je porezni obveznik registrovao djelatnosti u toku poslovne godine.

Obveznik komunalne takse dužan je Poreznoj ispostavi Maglaj podnijeti prijavu za komunalnu taksu na Obrascu KT 01, koji je sastavni dio ove Odluke i nalazi se u Poreznoj ispostavi Maglaj.

Obveznik komunalne takse nakon izvršene prijave (dodijeljenog DLN kodā ili prijemnog pečata PI Maglaj) dužan je primjerak iste dostaviti lično u Općinu Maglaj putem Pisarnice Općine ili na mail: opejna@maglaj.ba.

Ukoliko takseni obveznici u propisanom roku ne podnesu prijave ili daju netačne podatke, prijavu takse izvršit će Porezna ispostava Maglaj u roku od 15 dana, u skladu sa odredbama Zakona o Poreznoj upravi Federacije BiH i podzakonskim aktima.

Član 9.

(Obračun i način plaćanja)

Taksa iz člana 2. ove Odluke se obračunava i plaća na način iz:

- tačke 1. - dnevno i to 24 sata prije organizovanja muzike uživo u ugostiteljskim i drugim objektima,
- tačke 2. - dnevno po osobi,
- tačke 3. - mjesečno, na osnovu prijave koju je takseni obveznik dužan da podnese Poreznoj ispostavi Maglaj prije isticanja objava, oglasa i saopštenja na javnim mjestima odnosno zauzimanja i korištenja slobodne površine, taksa se obračunava po m² površine i mora se uplatiti odmah,

- tačke 4. - godišnje, po jednom sredstvu za priređivanje igara na sreću,
- tačke 5. - mjesečno, prema broju stolova koji se koriste u periodu korištenja ljetnih bašta,
- tačke 6. - godišnje, po postavljenom ili instaliranom uređaju.

Član 10.

(Sadržaj taksene obaveze)

Naplatu utvrđenih obaveza po osnovu komunalne takse vrši Porezna ispostava Maglaj u skladu sa odredbama Zakona o Poreznoj upravi Federacije BiH i podzakonskim aktima.

Prijava za razrez komunalne takse sadrži slijedeće podatke: naziv firme, sjedište i adresa taksenog obveznika, brojeve transakcijskih računa otvorenih kod banaka i iznos komunalne takse.

Član 11.

(Osnovica komunalne takse)

Osnovica komunalne takse za korištenje uređaja za pružanje usluga mobilne telefonije i elektroenergetskih objekata kojim se vrši prenos električne energije (trafostanice) je jedinstvena i iznosi 150,00 KM uz primjenu ostalih mjera za utvrđivanje visine komunalne takse.

Član 12.

(Visina komunalne takse)

- 1) Mjerilo za utvrđivanje visine komunalne takse za korištenje uređaja za pružanje usluga mobilne telefonije i elektroenergetskih objekata kojim se vrši prenos električne energije (trafostanice) su: koeficijent položajne pogodnosti, zona u kojoj su postavljeni uređaji za pružanje usluga mobilne telefonije i elektroenergetskih objekata kojim se vrši prenos električne energije (trafostanice) i veličina pravnog lica u smislu kriterija o razvrstavanju pravnih lica na osnovu člana 5. Zakona o računovodstvu i reviziji u Federaciji Bosne i Hercegovine („Službene novine Federacije BiH“, broj: 15/21).
- 2) Pod pogodnošću podrazumijeva se obim i stepen izgrađenosti i uređenosti i položaja zemljišta komunalnim građevinama i instalacijama, saobraćajne povezanosti, vrste i kapaciteta objekta za svakodnevno i periodično snabdijevanje, stepena pokrivenosti naselja objektima za zdravstvo, obrazovanje i kulturu i prirodnih uslova.
- 3) Koeficijent položajne pogodnosti određen je jedinstveno za sva pravna i fizička lica tarifnog broja 6. Tarife općinske komunalne takse po zonama urbanog dijela općine Maglaj u zavisnosti od zona u kojoj su postavljeni uređaji za pružanje usluga mobilne telefonije i elektroenergetskih objekata kojim se vrši prenos električne energije (trafostanice) u skladu sa Odlukom o građevinskom zemljištu općine Maglaj („Službene novine Općine Maglaj“, br. 4/19 i 6/19).
Spisak ulica, MZ-a i naseljenih mjesta po zonama, u skladu sa Odlukom o građevinskom zemljištu općine Maglaj, čini njen sastavni dio i sačinjen je od strane Službe za urbanizam, geodetske i imovinsko pravne poslove Općine Maglaj.

Koeficijent položajne pogodnosti po zonama utvrđuje se na sljedeći način:

Zone u skladu sa Odlukom o građevinskom zemljištu općine Maglaj	I	II	III	IV	V	VI
Koeficijent položajne pogodnosti po zonama	1,35	1,30	1,25	1,20	1,10	1,00

Koeficijent veličine pravnog lica u smislu kriterija o razvrstavanju pravnih lica na osnovu člana 5. Zakona o računovodstvu i reviziji u Federaciji Bosne i Hercegovine („Službene novine Federacije BiH“, broj: 15/21) određen je u tarifnom broju 1. i 7. Tarife općinske komunalne takse sa oznakom (KV) – pravna lica, sa posljednjim završnim obračunom ovjerenim kod Finansijsko-informatičke agencije (FIA) Federacije BiH.

Prema odredbama Zakona o računovodstvu i reviziji u Federaciji Bosne i Hercegovine pravna lica u smislu ovog zakona, razvrstavaju se na:

- Mikro pravna lica su ona pravna lica koja na dan sačinjavanja finansijskih izvještaja ne prelaze granične vrijednosti najmanje dva od sljedećih kriterija:
 - prosječna vrijednost poslovne imovine na kraju poslovne godine je do 350.000,00 KM;
 - ukupan godišnji prihod je do 700.000,00 KM;
 - prosječan broj zaposlenih u godini za koju se podnosi finansijski izvještaj je do devet.
- Mala pravna lica su ona koja na dan sačinjavanja finansijskih izvještaja ne prelaze granične vrijednosti najmanje dva od sljedećih kriterija:
 - prosječna vrijednost poslovne imovine na kraju poslovne godine je do 4.000.000,00 KM;
 - ukupan godišnji prihod je do 8.000.000,00 KM;
 - prosječan broj zaposlenih u godini za koju se podnosi finansijski izvještaj je do 49.
- Srednja pravna lica su ona koja na dan sačinjavanja finansijskih izvještaja prelaze dva kriterija iz stava za mala pravna lica, ali ne prelaze granične vrijednosti najmanje dva od sljedećih kriterija:
 - prosječna vrijednost poslovne imovine na kraju poslovne godine je do 20.000.000,00 KM;
 - ukupan godišnji prihod je do 40.000.000,00 KM;
 - prosječan broj zaposlenih u godini za koju se podnosi finansijski izvještaj je do 249.

U srednja pravna lica razvrstavaju se i ona koja prelaze graničnu vrijednost jednog od kriterija iz stava za velika pravna lica iz ovog člana.

- Velika pravna lica su ona koja na dan sastavljanja finansijskih izvještaja prelaze granične vrijednosti najmanje dva od sljedećih kriterija:
 - prosječna vrijednost poslovne imovine na kraju poslovne godine je do 20.000.000,00 KM;

- ukupan godišnji prihod je 40.000.000,00 KM;
 - prosječan broj zaposlenih u godini za koju se podnosi finansijski izvještaj je 249.
- 4) Koeficijent položajne pogodnosti utvrđen je zavisno od pogodnosti koje se obezbjeđuju obvezniku komunalne takse u zoni u kojoj su postavljeni uređaji za pružanje usluga mobilne telefonije i elektroenergetskih objekata kojim se vrši prenos električne energije (trafostanice) odnosno obavlja djelatnost.

III TARIFA KOMUNALNIH TAKSI OPĆINE MAGLAJ

Tarifni broj 1.

- Za priređivanje muzike uživo u ugostiteljskim objektima plaća se komunalna taksa dnevno u iznosu od 50,00 KM.
- Za priređivanje muzike uživo duže od jednog dana za svaki naredni dan plaća se komunalna taksa u iznosu od 10,00 KM.
- Za priređivanje koncerata, proslava i sl. manifestacija u zatvorenom prostoru plaća se komunalna taksa u iznosu od 100,00 KM.
- Za priređivanje koncerata, proslava i sl. manifestacija na otvorenom prostoru plaća se komunalna taksa u iznosu od 100,00 KM.

Tarifni broj 2.

- Za svako noćenje u objektima za smještaj gostiju (hoteli, moteli, prenočišta, kampovi i sl.) plaća se komunalna taksa po osobi u iznosu od 2,00 KM.

Tarifni broj 3.

Za isticanje objava, oglasa i saopštenja na javnim mjestima plaća se jednokratna taksa i to:

- za seriju do 100 komada 50,00 KM,
- za seriju preko 100 komada 100,00 KM,
- za postavljanje stalnih panoa, billboard reklamni panoa i display-a na 1 m² plaća se taksa mjesečno 2,50 KM. Isticanje objava, oglasa i saopštenja na javnim mjestima vrši se u skladu sa odredbama Odluke kojom se tretira komunalni red na području općine Maglaj.

Tarifni broj 4.

- Za držanje sredstava za priređivanje zabavnih igara (fliperi, video igre, pikado, bilijar, i slično) plaća se komunalna taksa godišnje po jednom sredstvu za priređivanje zabavnih igara u iznosu od 200,00 KM.
- Za držanje sredstava za priređivanje igara na sreću (ruleti, poker aparati, sve vrste slot aparata i slično) plaća se komunalna taksa godišnje po jednom sredstvu za priređivanje igara na sreću u iznosu od 1.000,00 KM.
- Za držanje tombole i slično po priređivačkom mjestu iznos od 200,00 KM.

Tarifni broj 5.

- Za postavljanje stolova ispred ugostiteljskih objekata plaća se komunalna taksa po stolu dnevno 0,30 KM gdje se ne toče alkoholna pića, 0,50 KM gdje se toče alkoholna pića.
- Za postavljanje stolova, pultova i tezgi za prodaju i reklamu knjiga, štampe, bižuterije, razglednica, cvijeća, voća i povrća, prehrambenih roba ili bilo kojih drugih proizvoda, taksa se plaća po prodajnom mjestu – dnevno 2,00 KM.
- Za zauzimanje slobodnih površina za postavljanje zabavnih radnji koje se vrše od mjesta do mjesta, taksa se plaća po m² zauzete površine dnevno 1,00 KM.
- Sva pravna i fizička lica koja su po ovoj Odluci razvrstana u VI zonu, a svoju obavezu po osnovu komunalne takse plaćaju shodno Tarifnom broju 6. stav 1., obavezu plaćaju u iznosu umanjenom za 50% ovog tarifnog broja.

Tarifni broj 6.

Za korištenje uređaja za pružanje usluga mobilne telefonije i elektroenergetskih objekata kojim se vrši prenos električne energije – trafostanice, i to:

- Bazna stanica mobilne telefonije,
- Mikrobazna stanica mobilne telefonije i kablovskih operatera,
- Predajnici (pasivni repetitori), antene i drugi uređaji na stubovi,
- Trafostanica 220/110/35/10 KV,
- Trafostanica 110/35/10 KV,
- Trafostanica 35/10 (20) KV,
- Trafostanica 10 (20)/0,4 KV,
- Stubna trafostanica,

plaća se komunalna taksa korištenjem tabele za pravna lica:

R/B	KOEFIČIJENT VELIČINE PRAVNOG LICA	KOEFIČIJENT POLOŽAJNE POGODNOSTI PO ZONAMA					
		I	II	III	IV	V	VI
1	MIKRO PRAVNA LICA KV = 2	1,35	1,30	1,25	1,20	1,10	1,00
2	MALA PRAVNA LICA KV = 5	1,35	1,30	1,25	1,20	1,10	1,00
3	SREDNJA PRAVNA LICA KV = 8	1,35	1,30	1,25	1,20	1,10	1,00
4	VELIKA PRAVNA LICA KV =12	1,35	1,30	1,25	1,20	1,10	1,00

Član 13.

(Nadzor i kontrola prijave)

Nadzor i kontrolu prijave, obračuna i plaćanja općinske komunalne takse vrši Porezna ispostava Maglaj u saradnji sa općinskom Službom za privredu, finansije/financije i razvoj poduzetništva.

Porezna ispostava Maglaj i Općina Maglaj, odnosno nadležne općinske službe, obavezni su međusobno sarađivati, bez nadoknade, te su dužni razmjenjivati informacije koje su relevantne za obavljanje dužnosti koje su povjerene poreznim organima.

Obavezuje se Porezna ispostava Maglaj da Službi za privredu, finansije/financije i razvoj poduzetništva dostavi izvještaj o poreznim obveznicima koji su izvršili prijavu komunalne takse u roku od 15 dana od dana isteka roka za prijavu iste.

Obavezuje se Služba za privredu, finansije/financije i razvoj poduzetništva Općine Maglaj da u saradnji sa Poreznom ispostavom Maglaj da do 15. januara tekuće godine usaglasi spisak registriranih pravnih i fizičkih lica na području općine Maglaj, poreznih obveznika za plaćanje općinske komunalne takse.

Obavezuje se Služba za urbanizam, geodetske i imovinsko pravne poslove Općine Maglaj da do 15. januara tekuće godine redovno dostavlja Poreznoj ispostavi Maglaj spisak korisnika uređaja za pružanje usluga mobilne telefonije i elektroenergetskih objekata kojim se vrši prenos električne energije – trafostanice iz člana 14. Tarifni broj 7. sa podacima: nosiocima vlasništava nad navedenim uređajima, brojem uređaja i zoni u kojoj se isti pojedinačno nalaze.

IV KAZNE NE ODREDBE

Član 14.

(Visina kazne)

- 1) Novčanom kaznom u iznosu od 500,00 KM do 5.000,00 KM kaznit će se za prekršaj pravno lice koje u roku propisanom ovom Odlukom i Tarifom komunalnih taksi, koje se plaćaju na području općine Maglaj, ne prijavi ili da netačne podatke ili ne plati propisanu komunalnu taksu.
- 2) Novčanom kaznom u iznosu od 100,00 KM do 2.000,00 KM kaznit će se za prekršaj odgovorno lice u pravnom licu, koje u roku propisanom ovom Odlukom i Tarifom komunalnih taksi, koje se plaćaju na području općine Maglaj, ne prijavi ili da netačne podatke ili ne plati propisanu komunalnu taksu.
- 3) Novčanom kaznom u iznosu od 100,00 KM do 2.000,00 KM kaznit će se za prekršaj fizičko lice - vlasnik samostalne radnje koji u propisanom roku ovom Odlukom i Tarifom komunalnih taksi, koje se plaćaju na području općine Maglaj, ne prijavi ili da netačne podatke ili ne plati propisanu komunalnu taksu.
- 4) Pored izrečenih kazni, Porezna ispostava Maglaj će vršiti prinudnu naplatu takse u skladu sa Pravilnikom o procedurama prinudne naplate poreznih obaveza u Federaciji BiH.

V PRELAZNE I ZAVRŠNE ODREDBE

Član 15.

(Primjena Odluke)

Za provođenje ove Odluke zadužuje se Kantonalni porezni ured Zenica – Porezna ispostava Maglaj.

Služba za privredu, finansije/financije i razvoj poduzetništva Općine Maglaj će vršiti povremene kontrole prijave, te usklađivati podatke sa Poreznom ispostavom Maglaj.

Stupanjem na snagu ove Odluke prestaje važiti Odluka o komunalnim taksama općine Maglaj ("Službene novine Općine Maglaj", br. 1/21 i 12/21).

Član 16.

(Stupanje na snagu)

Ova Odluka stupa na snagu danom donošenja i bit će objavljena u "Službenim novinama Općine Maglaj".

PREDSJEDAVAJUĆA

Aida Bašić

Obrazac KT 01

Naziv pravnog lica ili ime i prezime fizičkog lica																											
Identifikacioni broj poreskog obveznika		<table border="1"> <tr> <td></td><td></td><td></td><td></td><td></td><td></td><td></td><td></td><td></td><td></td><td></td><td></td><td></td><td></td> </tr> </table>																									
Adresa sjedišta obveznika																											
Brojevi transakcijskih računa		Naziv banke:																									
		<table border="1"> <tr> <td></td><td></td><td></td><td></td><td></td><td></td><td></td><td></td><td></td><td></td><td></td><td></td><td></td><td></td> </tr> </table>																									
		Naziv banke:																									
<table border="1"> <tr> <td></td><td></td><td></td><td></td><td></td><td></td><td></td><td></td><td></td><td></td><td></td><td></td><td></td><td></td> </tr> </table>																											
Broj poslovnih jedinica na području općine Maglaj																											
Kantonalni porezni ured					Porezna ispostava																						

PRIJAVA
OPĆINSKE KOMUNALNE TAKSE ZA 20____. GODINE

Red. broj	Mjesto i tačna adresa svake istaknute firme	Koeficijent položajne pogodnosti(samo za TB 1)	Koeficijent veličine pravnog lica (samo za pravna lica)	Tarifni broj	Obračunska jedinica za TB 2,3,4,5,6,7	Iznos takse u KM
UKUPAN IZNOS KOMUNALNE TAKSE:						_____ KM

Datum _____ 20____. godine

PODNOŠILAC PRIJAVE

OBRAZLOŽENJE

PRAVNI OSNOV

Pravni osnov za donošenje ove Odluke sadržan je u odredbama slijedećih relevantnih zakona:

- Zakona o principima lokalne samouprave u Federaciji BiH ("Službene novine Federacije BiH", br. 49/06 i 51/09) člana 8. stav 3., člana 13. stav 2. alineja 4. i člana 36. i 37. "Organ odlučivanja jedinice lokalne samouprave je Općinsko vijeće, ...(u daljem tekstu Vijeće)". Općinsko vijeće u okviru svojih nadležnosti: donosi propise o porezima, taksama, naknadama i doprinosima jedinica lokalne samouprave u skladu sa zakonom".
- Zakona o pripadnosti javnih prihoda u Federaciji BiH ("Službene novine Federacije BiH", broj: 22/06, 43/08, 22/09, 35/14 i 95/15) član 13. stav 1. tačka c) i stav 3. "Pored udjela u raspodjeli prihoda iz člana 6. ovog Zakona, jedinicama lokalne samouprave pripadaju i drugi javni prihodi kako slijedi: c) naknade i takse u skladu sa propisima jedinica lokalne samouprave" (...). "Općinska vijeća donose propise kojima se utvrđuje visina naknade na osnovu korištenja i uređenja zemljišta, kao i visina drugih naknada, novčanih kazni i taksi u njihovoj nadležnosti."
- Statut Općine Maglaj-prečišćen tekst ("Službene novine Općine Maglaj" broj 8/07, 3/08, 6/08, 6/24 i 6/25) član 18. Općinsko vijeće nadležno je da "- donosi propise o porezima, taksama, naknadama i doprinosima općine u skladu sa zakonom, i - donosi odluke, rješenja, propise i opće akte".
- Odluka Ustavnog suda Bosne i Hercegovine („Službeni glasnik BiH“, broj: 12/24)

RAZLOZI ZA DONOŠENJE

Komunalna taksa je općinski prihod koji se u svim općinama i gradovima u Bosni i Hercegovini ostvarivao uglavnom u skladu sa Zakonom o komunalnim taksama iz SRBiH, po Zakonu iz 1977. godine i izmjenama iz 1988. i 1989. godine („Službeni list SRBiH“, br.21/77, 35/88 i 26/89), te po Zakonu o pripadnosti javnih prihoda u Federaciji BiH. Posljednja Odluka o komunalnim taksama općine Maglaj broj: 02-04-1-344/20 donesena je 30.12.2020. godine, a zatim su nastupile njene izmjene: Odluka o privremenoj izmjeni i dopuni Odluke o komunalnim taksama općine Maglaj broj: 02-45-1-285/21 od 03.02.2021. godine, Odluka o izmjeni i dopuni Odluke o komunalnim taksama općine Maglaj broj: 02-04-1-2289/21 od 28.12.2021. godine i Odluka o privremenoj izmjeni i dopuni Odluke o komunalnim taksama općine Maglaj broj: 02-04-1-212/22 od 10.02.2022. godine. U skladu sa iznosima definisanim u Odluci, Porezna uprava je vršila naplatu prihoda od privrednih subjekata. S obzirom na visinu iznosa koji su se utvrđivali u pogledu naplate komunalne takse na istaknutu firmu, postojali su sudski procesi oko visine iznosa, gdje su pokretači uglavnom bile kladionice. Odluke su osporavane i na Ustavnom sudu.

Ustavni sud Bosne i Hercegovine je 18.01.2025. godine odlučujući u zahtjevu Kantonalnog suda u Tuzli za ocjenu ustavnosti člana 3. stav 1. tačka 4. i stav 2, te člana 12. Zakona o komunalnim taksama („Službeni list SRBiH“, br.21/77, 35/88 i 26/89) utvrdio da član 3. stav 1. tačka 4. i stav 2, te član 12. Zakona o komunalnim taksama nisu u skladu sa članom II/3.k Ustava Bosne i Hercegovine i članom 1. Protokola broj 1 uz Evropsku konvenciju o zaštiti ljudskih prava i osnovnih sloboda.

Shodno navedenom, u skladu sa članom 61. stav (2) Pravila Ustavnog suda, Ustavni sud je donio Odluku kojom se ukida član 3. stav 1. tačka 4. i stav 2, te član 12. Zakona o komunalnim taksama („Službeni list SRBiH“, br.21/77, 35/88 i 26/89), a u skladu sa članom 61. stav (3) Pravila Ustavnog suda, član 3. stav 1. tačka 4. i stav 2, te člana 12. Zakona o komunalnim taksama prestaju važiti narednog dana od dana objavljivanja odluke Ustavnog suda Bosne i Hercegovine u „Službenom glasniku Bosne i Hercegovine.“

Konkretno, odredbe Zakona o komunalnim taksama koje su prestale da važe su:

Član 3. stav (1) tačka 4. „Komunalne takse mogu se propisati za: 4. Svaku istaknutu firmu“.

Član 3. stav (2) „Pod istaknutom firmom, u smislu tačke 4. stav 1. ovog člana, podrazumijeva se svaka oznaka ili natpis koja označava da određeno fizičko ili pravno lice obavlja izvjesnu djelatnost ili zanimanje izuzev oznaka i natpisa na zgradama organa i organizacija društveno-političkih zajednica, državnih organa, organizacija udruženog rada i drugih samoupravnih organizacija i zajednica koje vrše poslove od posebnog društvenog interesa.

Član 12 „Visina komunalnih taksa ne može se odmjeravati prema vrijednosti predmeta, izvršenom prometu ili ostvarenom prihodu

Komunalna taksa za istaknutu firmu može se propisivati u različitoj visini zavisno od vrste i mjesta obavljanja djelatnosti.

Skupština opštine može, za određene djelatnosti, propisati komunalnu taksu iz prethodnog stava u dvostruko većem iznosu za firmu istaknutu na objektima koji su registrovani kao spomenici kulture kao i na objektima koji se nalaze u okviru područja koje je proglašeno dobrom kulturno-istorijskog nasljeda.

U obrazloženju Odluke Ustavnog suda stoji da lokalna samouprava ne pruža protuuslugu za finansijsku obavezu koja postoji u plaćanju komunalne takse, odnosno poslovni subjekt za isticanje firme ne dobiva nikakvu uslugu od bilo kojeg državnog organa, već samo ispunjava zakonom propisanu obavezu tako što firmu čini vidljivom za javnost, dakle obavezu koju ne može izbjeći.

Nadalje, Ustavni sud smatra da se ovakva obaveza ne može smatrati ni taksom, a ni porezom, nego da se u konkretnom slučaju u pogledu naknade na istaknutu firmu radilo o sui generis javnom prihodu, koji poslovni subjekti plaćaju samo zato da bi ispunili zakonsku obavezu da istaknu firmu na prostoru koji koriste nakon što se registruju.

Ustavni sud Federacije Bosne i Hercegovine, odlučujući o zahtjevu zamjenika Premijera Federacije Bosne i Hercegovine za davanje Mišljenja u vezi sa primjenom stavova Ustavnog suda Federacije Bosne i Hercegovine utvrđenih u presudama tog suda u odnosu na komunalne naknade na istaknutu firmu, u smislu člana IV.B.3.7.d. (III) Ustava Federacije Bosne i Hercegovine, na sjednici Suda bez javne rasprave održanoj dana 09.04.2025. godine, utvrdio Mišljenje da obaveza plaćanja komunalne naknade na istaknutu firmu nije u skladu sa Ustavom Federacije Bosne i Hercegovine.

Općinsko vijeće je dužno postupati u skladu sa navedenim Mišljenjem, te u razumnom roku predmetne propise izmijeniti na način da se iz istih brišu odredbe koje se odnose na obavezu plaćanja komunalne naknade na istaknutu firmu. S obzirom da je Odlukom o komunalnim taksama općine Maglaj, koja je na snazi, određeno da se komunalne takse plaćaju na svaku istaknutu firmu, potrebno je Odluku izmijeniti i uskladiti sa Ustavom.

Iako se donošenjem ove Odluke direktno utiče na Budžet Općine u pogledu umanjavanja prihoda, odluke Suda su konačne i obavezujuće, te time svi organi vlasti u Bosni i Hercegovini su dužni, u okviru svojih nadležnosti, provoditi odluke Suda.

Prijedlog ove Odluke se odnosi na izradu nove općinske Odluke o komunalnim taksama, i usvajanjem Prijedloga ove Odluke omogućit će se nastavak naplate javnih prihoda – direktnih poreza iz nadležnosti jedinica lokalne samouprave.

Općinski načelnik je imenovao radni tim koji je utvrdio pravni okvir Odluke Ustavnog suda Bosne i Hercegovine, kao i važeću Odluku o komunalnim taksama općine Maglaj i njene izmjene.

Shodno navedenom, a radi usklađivanja važeće Odluke sa Ustavom, predlažem Općinskom vijeću Maglaj da usvoji ovu Odluku.

Obradivači:

1. Azra Čakrama

2. Emina Hasanić

3. Ferhat Bradarić



PREDLAGAČ
OPĆINSKI NAČELNIK
Maid Suljaković